

Юбилей

Нимыз театрлэсь люконтэм



Егор ЗАГРЕБИН  
(1937-2015)

Егор Загребин шуиськомы ке, син азе пуксё Удмурт театрлэн спектакльёсысьтыз суредьёс — «Насьток но Исьток», «Эн кушты, мынам туганэ», «Эш-Тэрек»...

Егор Егорович вордскиз Якшур-Бодья ёросысь Кутоншур гуртын. Йылпумъяз Ленинградсь А. Островский нимо театральной институтэз, бертыса Удмурт драматической театрын шудйз. Собере Удмурт телевидениын режиссёр вал. Удмурт театрын пьесаос быръён понна кыл кутылйз. 1990-тй аръёсы «Инвожо» журналлэн валтйсь редакторез вал. 1999-тй-2014-тй аръёсы Удмуртиысь Писательёслэн огазеяськонэнызы кивалтйз. Е. Загребин литературае пырыз 1960-тй аръёсысен, соку Удмурт театрын пуктызы солэсь нырысетй пьесаэз — «Тулыс зор» драматэ. «Эн кушты, мынам туганэ» комедизэ, зуч кылэ берыктыса, шудйзы Чувашиын, Ставропольын но мукет театрёсын. 2001-тй арын «Эш-Тэрек» трагедиез понна Е. Загребин Удмурт Элькунлэн Кун премиеныз пусьмын. Пьесаосаз со удмурт сямлэсь юн пальёссэ возматылйз, лэчыт темаосты жутылйз. Озы ик гожъял-ляз пинальёслы но бадзьымёслы веросьёс, повестьёс.

Удмурт литератураез азинтэмез понна Е. Загребинлы 2004-тй арын Удмуртиысь калык писатель ним сётэмын.

Дасямын «Писатели и литературоведы Удмуртии» справочникъя.

# Улонын но артист вал

Мар огазея Уильям Шекспирез но Егор Загребинэз?

Йёскалык библиотекаын Удмуртиысь калык писательлы Егор Загребинлы сйзем «Сюлэм куара. Голос сердца. Жизнь и творчество Егора Загребина» книгаен тодматскон ортчиз.

## Ушьян

Удмурт калыклэн дано пиезлы, 20-тй даурлэн кыкетй люкетысьтыз тужгес тодмо писательлы но драматурглы Егор Загребинлы 85 арес тырмонлы сйзем бичетэ люкамын 47 статья. Татын Егор Егорович усьтйське писатель, драматург, адыми сямен. Книгае пырызиз дневникысьтыз чурьёсыз, фин но пор кылъёсы берыктэм вакчи произведениосыз, адымиослэн тодэ ваёнъёсы. Удмурт но зуч кылъёсын потэм сборник бордын ужазы тодосчиос Алексей Загребин, Роза Кириллова но писатель Ада Диева.

Жыт туж шунит ортчиз. Татчы люкасыкызы Егор Загребинэн чош ужам адымиос, тодосчиос, солэн чыжывыжыосыз, эшъёсыз. Соосты пумитаса, писательлэн пиез — история наукаосъя доктор, Кун Думалэн азьвыл депутатэз Алексей Загребин шуиз: — Шумпотйсько, туннэ мон атаелэн эшъёсыз пöлын шуыса. Шумпотйсько, аслэсьтым эшъёсме татысь адъыса. Озы кылдэм, мон нуллысько бадзьым нимтулэз. Тае мон соку ик ой вала, аръёс ортчемъя гинэ тодй-шöдй, монэ учко, чошато, дунъяло шуыса. Соку валай: уг яра атаез возытэ вуттыны. Бен, яра «кык» басяны, яра йыртэмань, малы ке шуоно Егор Егорович ачиз шаянтыны яратйсь адыми вал. Атайме огшоры ой шуысал, но со туж бадзьым сюлемо но адымиыко вал. Со монэ огпол гинэ ушъяз, но со зеч кылъёсыз тырмозы быдэс улонэлы. Мон соку 1-тй курсын дышеткисько вал, гожъясько курсовойме, 3 часын чукна атаен кухняын пумиськымы. Со шорам учкиз но шуиз: молодец, пие, зол ужаськод...



Кун Думаысь депутат Олег Гарин:

— Егор Егорович мыным төлпери кадъ потылйз. Ялан кытчы ке дыртэ вал. Лыктйз! Адъиз! Вормиз! Шораз учкыса, та кылъёс йыре лыкто вал. Ваньмыз сярысь озы уд вера, нош со чапак сыче шаплы, дйсьтйсь но йёспöртэм вал.



Национальной библиотекалэн кивалтйсь Татьяна Тензина но история наукаосъя доктор Алексей Загребин веразы Егор Загребинлэн улонэз но творчествоез сярысь.

Та книга бордын малпаскымы, спорьяськымы, кенешимы 3 ар чоже. Мон тау карисько ваньмызлы, кин аслэсьтыз малпанъёссэ шараяз, тодэ ваёнъёссэ гожтйз, Е. Загребинлэн творчествоез пумысен мылкыдъёссэ усьтйз. Кыче жаль, атае сыче вазь улоньы кошкы шуыса. Но мукет ласянь, со нокутчы оз но кошкы кадъ. Мон соин вераськисько котькуд нунал, юасько: шонер-а мон лэсьтйсько? Атаелэн бадзьым кужымез мыным улыны юрттэ.

## Фальстаф но Лөпшо Педунь

Филология наукаосъя доктор Татьяна Зайцева вераз Е. Загребинлэн кужмо но лэчыт публицистикаез сярысь. Нош филология наукаосъя кандидат Татьяна Зверева — бадзьым но визьмо драматургиез сярысь. Со чошатйз Е. Загребинэз У. Шекспирен. Англи литератураын У. Шекспир гинэ, нош зуч литератураын А. Сумароков но А. Островский гинэ кылдытйзы «асьсэ» театрзэс, соос тодо вал сценаез но котькуд артистэз. Е. Загребин но озы ик ужаз. Со вала вал, кыче драматургия кулэ туалалэс удмурт театры.

Тодмо калык писатель, литературовед Александр Шкляев но та жытэ У. Шекспир вылэ вуиз. Со верамъя, Егор

Загребин пушкын пöлэстйсько вал У. Шекспирлэн Фальстафез но удмурт фольклорысь Лөпшо Педунь.

— Писатель комедийсь трагедие вамыштйз, солэн аслаз улонан но комедиез но, трагедиез (калык тушмонлэн пиез) но тырмыт вал. Маин эшшо тунсыко Егор Егорович? Со сцена вылын гинэ артист ой вал, улоньы но актёр вал, — пусйиз Александр Григорьевич.

Писатель но критик Виктор Шибанов вакчияк вераз Е. Загребинлэн удмурт литературае пыраклы кылем произведениосыз сярысь. Кылсъярысь, «Насьток но Исьток» но «Мусое мынам, мусое» комедиез, «Кикы нош силе но силе» трагедия, «Асьмелэн со одйг» драма.

## Эшъёс пöлын

Нокин но асьмемыз чош дышетскем, ужам юлтошъёсмылэсь умойгес уг тоды. Та жытын но туж тунсыко вераськызы, маскара учыръёссэс тодазы вайызы Егор Егоровичлэн эшъёсыз — артистёс-режиссёрёс Александр Блинов но Леонид Романов. Егор Загребинлэн, сцена вылын шудыкуз, зок гримм пыртйз но, пе, адъиське вал гордэктэмез, сыче змос но оскымон шудылэм. Егор Загребин Удмурт театрлэсь

спектакльёсын шыкысэ зол узырмытйз. Со 30-лэсь уно пьесаос гожтйз. Кылсъярысь, «Насьток но Исьток» крезьгуро комедия 1982-тй арын нырысьсэ пуктэмын вал. Сое 300-лэсь трос пол сцена вылын возматйзы. Та жытэ Удмурт театрысь егит артистёс Наталья Буранова но Алексей Котков возматйзы выльдэм «Насьток но Исьток» комедилэсь оглюкетсэ.

Вераны кулэ, Е. Загребинлэн юбилееныз валче «Удмуртия» издательство кылем арын поттйз «Чук лысвуос» книга. Йёскалык библиотекаын дасям выставкаын та бичетэн тодматскыны луонлык вал. Издательстволэн кивалтйсь Юрий Кузнецов шуиз:

— Егор Егоровичез кужмо драматург шуо, со озы ик вань. Но мон понна со нырысь ик нылпиослы верос гожъясь усточи. «Чук лысвуос» сборнике ми люкамы солэсь пинальёслы гожтэм зол веросьсэс.

Егор Загребинлэн бадзьымёслы гинэ öвöл, покчи учкисьёслы-кылзйсьёслы тунсыко луэмез сярысь вераськиз культура министр Владимир Соловьёв но:

— Егор Егоровичен мон тодматски 1983-тй арын, Пичи Пургалан практикаме ортчыкум. Соку школьникёсын пумиськон радъямын вал. Е. Загребинэз нылпиос туж мыло-кыдо кылзйзы. Нош мынам тодам кылиз солэн пинальёслы вазиськемез. Егор Егорович шуиз: пинальёс, гожтэт гожъялэ. Гожъяськись нылпиос пöлысь будо писательёс но драматургёс.

Егор Загребин — артист, писатель, очеркист, журналист. «Сюлэм куара» книга — Егор Егоровичез пöртэм ласянь возматыны тыршонлэн нырысетй емышез. Кызы шуо удмуртёс: зеч лэсьтэм уж калыке всеякы кельтэм зеч кузьым луэ. Озы шуыны луэ Егор Загребинлэн творчествоез сярысь но, выль потэм книга пумысен но.

Галина СЕМЁНОВА



Кун Кенешлэн Тöроезлэн воштйсьез Татьяна Ишматова:

— Монэ паймытэ вал Егор Егоровичлэн гуртысь вуэм нылпиосын, бадзьым муртёсын сямен, нимын-тулын гажаса кенешемез. Кельше вал ым тросаз вераськемез, ачиз ик вера, ачиз ик куанэ.